

ABRAHAM SACRIFIANT

Abraham.

O Dieu !

Isaac.

O Dieu !

Abraham.

Seigneur, voilà que c'est
De t'obeir. Voicy mon cas tout prest :
Prendre le veu.

Icy prend le mouton.

L'Ange.

Abraham.

Abraham.

Me voicy,

Seigneur, Seigneur.

L'Ange.

Le Seigneur dit ainsi :

- [905] Je te promets par ma grand' maiesté,
Par la vertu de ma diuinité,
Puis que tu as voulu faire cela,
Puis que tu m'as obey iusques là,
De n'espargner de ton seul fils la vie :
[910] Maugré Satan & toute son enuie,
Benir te veu avec toute ta race.
Vois-tu du ciel la reluisante face ?
Vois-tu les grains de l'arene au riuage ?
Croistre feray tellement ton lignage,
[915] Qu'il n'y a point tant d'estoiles aux cieux,
Tant de sablon par les bords spacieux
De l'Ocean qui la terre enuironne,
Qu'il descendra d'enfans de ta personne.
Ils domteront quiconques les haira,
[920] Et par celuy qui de toy sortira,
Sur toutes gens & toutes nations
Je desploiray mes benedictions
Et grans thresors de diuine puissance,
Puis que tu m'as porté obeissance.